

Inatsisartut Suleriaasiata allanngortinneqarnissaanik siunnersuut**pillugu****Suleriaatsimut Ataatsimiititaliap****ISUMALIUTISSIISSUTAA****siunnersuutip aappassaaneerpeqarneranut saqqummiunneqartoq**

Ataatsimiititaliap suliarinninnerani ilaasortaapput:

Inatsisartut Siulittaasuat Josef Motzfeldt, IA, formand
Inatsisartunut ilaasortaq Per Berthelsen, Siumut
Inatsisartunut ilaasortaq Olga P. Berthelsen, IA
Inatsisartunut ilaasortaq Finn Karlsen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Siverth K. Heilmann, Atassut
Inatsisartunut ilaasortaq Knud Fleischer, Kattusseqatigiit Partiiat

2. maj 2012 siullermeerinninnermi Inatsisartut siunnersuut ataatsimiititaliamut innersuussutigaa. Tamatuma kingorna ataatsimiititaliap siunnersuut misissuataarsimavaa.

Siunnersuutip imarisai siunertaalu

Siunnersuutip siullermik malitsigissavaa Inatsisartut ukiuata - taamalu aamma ukiakkut ataatsimiinnerit - septembarimi tallimangornerit aappaanni aallartittalernissaa, tassa malittarisasanut atuuttunut sanilliullugu sapaatip akunneranik ataatsimik siusinnerusumik. Taamaaliornikkut siunertarinearpoq ukiakkut ataatsimiittarnerit sapaatit akunnerannik ataatsimik sivit-sorsinnaanissaannut periarfissiinissaq taamalu aamma inatsisiliorluni sulinermt killigititanik pitsaanerusunik pilersitsinissaq.

Siunnersuutip aappaatut malitsigissavaa isumaliutissiissutinik ilassutitullu isumaliutissiissutinik oqaaseqarluni saqqummiussinnaanerup atorunnaarsinneqarnera. Periarfissaq taanna ullumikkut annertunngikkaluamik atorneqartarpoq; qaqutigunnaq isumaliutissiissutit ilassutitullu isumaliutissiissutit tamakkiisumik atuarneqarnerinut, akulikinnerusumilli taakkunani amerlanerussuteqarluni ikinnerussuteqarluniluunniit oqaaseqaatit atuarneqarnerinut. Aalajangersakkap taamatut atorneqartarnera aalajangersakkap eqqunneqarnerani siunertaasimagunanngilaq, tamannalu tunngaviusut ilagaat Siulittaasoqarfiup maanna siunnersuuteqarneranut periarfissap peerneqarnissaanik. Tamatuma saniatigut siunnersuut tunngaveqarpoq oqallinnerit

ilaatigut sivisusinnaanerisa killilerneqarnissaannik inimilu oqallinnerit uummarinnerulersin-neqarnissaannik kissaateqarnermik.

Siunnersuutip aningaasatigut allaffissornikkullu kingunerisassai

Siulittaasoqarfiup siunnersuut ukiumut nunatta karsianut kr. 200.000-it missaannik aningaasartuutaassasoq missingerpaa. Taamatut aningaasartuuteqarnerulerneq Inatsisartunut missingersuutit atuuttut annertusineqarnissaannik pisariaqartitsilissanngilaq.

Inatsisartut siunnersuummik siullermeerinninnerat

Siunnersuut siullermeerneqarnermini partiinit tamanit ilalernerqarpoq.

Siullermeerneqarneranut atatillugu Inuit Ataqtigiinnit kaammattuutigineqarpoq suleriaatsimut atuuttumut allannguutaasinnaasut suli marluk Suleriaatsimut Ataatsimiititaliamut isumaliutigeqqullugit.

Suleriaatsimut Ataatsimiititaliaq inatsisitigut inissisimanini pissutigalugu siunnersuutip sulierineqarneranut atatillugu allannguutissanik sukumiinerusunik saqqummiussinermigut suleriaatsip allanngortinneqarnissaanut siunnersuummik annertusisitsinnaanngilaq.

Suleriaatsimulli ataatsimiititaliaq qujarusuppoq suleriaatsip siunissami allanngortinneqartarnissaa eqqarsaatigalugu Siulittaasoqarfimmut Suleriaatsimullu Ataatsimiititaliamut taamatut eqqarsaatissanik tunisisoqarneranut. Tamatumunnga atatillugu apeqqutit saqqummiunneqartut marluk sukumiisumik oqallisigineqarumaarput.

Tusarniaanermi akissutit

Suleriaatsip allannguutissaatut siunnersuut Naalakkersuisuni Naalakkersuisut Siulittaasuata Naalakkersuisoqarfianut tusarniaatigineqarsimavoq. Naalakkersuisoqarfiup uparuarpaa siunnersuutikkut upernaakkut ataatsimiinnerup ukiakkullu ataatsimiinnerup akornanni piffissaq sivikinnerulissasoq, taamaalillutillu naalakkersuisoqarfiit inatsisissatut siunnersuutininik oqaluuserisassanillu ukiakkut ataatsimiinnermut ilanngunneqartussanik piareersaanissaminnut sivikinnerusumik piffissaqartinneqalissallutik. Naalakkersuisoqarfiup annilaangatigaa taamaaliornikkut annilaangatigineqarsinnaassasoq immikkoortut piffissaq tunniussivissaq qaangiute-reersoq immikkut akuerineqarluni nalunaarutigineqartariaqartalernissaat.

Suleriaatsimut Ataatsimiititaliap tamatumunnga atatillugu oqaatigissavaa siunnersuutit ataatsimiinnissaq sapaatit akunnerinik tallimanik sioqqullugu tunniutereersimanissaannik piumasaqaammik sanioqqutsisinnaanermut akuersissuteqarnissamut Siulittaasoqarfiup periarfissaqarnera Inatsisartunit akuerineqarsimasoq tamatigut tunuarsimaartumik atorneqartariaqarmat aatsaat immikkorluinnaq pissutissaqartillugu atorneqartariaqartoq. Taamaattumik Suleriaatsimut Ataatsimiititaliap naatsorsuutigilluinnarpaa siunnersuutip matuma akuerineqarnera kinguneqassanngitsoq taamatut immikkut akuersissuteqartarnerit amerlinerinik, isumaqarnarmami taakku maanna amerlareersut amerlavallaariinngikkunik.

Ataatsimiititaliap taamatutaaq maluginiarpaa ukiakkut ataatsimiinnissamut oqaluuserisassanik piareersaanermi pisariaqanngimmat upernaakkut ataatsimiinnerup naammassinissaata utaqeqqaarnissaa.

Tamatumunnga atatillugu ataatsimiititaliap aamma pissutissaqartippaa Inatsisartunut ilaasortanut kajumissaarutigissallugu aalajangiiffigisassatut siunnersuutini timitaalinissamut piffissaajunnartut eqqumaffigisaqqullugit, taakkumi timitalerneqarnissannut piffissaq naapertuuttoq aamma atorpeqartariaqartarmat.

Kiisalu ataatsimiititaliap maluginiarpaa ukiakkut ataatsimiittarnerup aallartittarnerata siuartinneqarnissaata aatsaat UKA 2013-imiit atuutilernissaanik Naalackersuisut kaammattuuteqarnerat siulittaasoqarfiup malinniarsimagaa. Suleriaatsimut Ataatsimiititaliap aamma tamanna pissusissamisoorutut isigivaa.

Ataatsimiititaliap oqaasererusutai allat

Siulittaasoqarfimmit oqaatigineqartutut ukiuni kingullerni Inatsisartut ataatsimiittarnerini oqaluuserisassat suliarineqarnissaannut piffissaalatsisarneq annertusiartuinnavissimavoq, minnerunngitsumik ukiakkut ataatsimiittarnerni. Tamatuma ataatsimiititaliani suliniarneq akornusersinnaasarpaa pipallatanillu inatsisiliorsinnaaneq qaninnerusinnaalluni.

Inatsisartut Siulittaasoqarfiat tamanna tunngavigalugu isumaqarpoq ukiakkut ataatsimiittarneq sapaatip akunneranik ataatsimik sivitsorneqartariaqartoq. Taamaalilluni ataatsimiinnermut oqaluuserisassanngortinneqarsimasut suliarinissaannut piffissaqarnerulissaaq, taamalu aamma siunnersuutit sukumiinerusumik suliarineqarsinnaalissallutik peqatigitillugulu ataatsimiinnerit ilaasortanut allattoqarfinnullu ulapaarfiunnginnerullutillu oqinnerulissallutik.

Suleriaatsimut Ataatsimiititaliap ukiakkut ataatsimiittarnerit taamatut sivitsorniarneqarnerat tamakkiisumik tapersersinnaavaa, neriullunilu taamatut sivitsuineq siunertarinqartutut sunnuteqarumaartoq.

Ataatsimiititaliap taamatutaaq isumaliutissiissutit oqaaseqarluni saqqummiunneqarsinnaanerannut tunngavissap suleriaatsimit peerneqarnera uparuagassartaqartinnigilaa.

Ataatsimiititaliap inassuteqaataa

Ataatsimiititaliap isumaqatigiittup taamatut oqaaseqarluni siunnersuutip akuerineqarnissaa inassutigivaa.

Taamatut oqaaseqarluni ataatsimiititaliap siunnersuut aappasaaniigassanngortippaa.

Josef Motzfeldt, Siulittaasoq

Per Berthelsen

Olga P. Berthelsen

Finn Karlsen

Justus Hansen

Siverth K. Heilmann

Knud Fleischer